

Na osnovu člana 24. stav 8., a vezano za član 26. Zakona o veterinarstvu u Bosni i Hercegovini ("Službeni glasnik BiH", broj 34/02) i člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), Vijeće ministara Bosne i Hercegovine, na prijedlog Ureda za veterinarstvo Bosne i Hercegovine, na 3. sjednici, održanoj 07. marta 2012. godine, donijelo je

**PRAVILNIK
O USLOVIMA UVOZA I PROVOZA ŽIVIH ŽIVOTINJA, SIROVINA, PROIZVODA I NUSPROIZVODA
ŽIVOTINJSKOG PORIJEKLA, VETERINARSKIH LIJEKOVA I HRANE ZA ŽIVOTINJE U BOSNU I
HERCEGOVINU**

Član 1.

(Predmet)

Ovim Pravilnikom propisuju se uslovi za uvoz i provoz u ili kroz Bosnu i Hercegovinu živih životinja, sirovina, proizvoda i nusproizvoda životinjskog porijekla, veterinarskih lijekova i medicinskih sredstava koji se upotrebljavaju u veterinarstvu kao i dijagnostičkih sredstava i hrane za životinje.

Član 2.

(Značenje termina)

Pojedini termini koji se koriste u ovom Pravilniku imaju sljedeće značenje:

- a) **"pošiljka"** je svaka pošiljka životinja, sjemena za vještačko osjemenjivanje, embrija i jajnih ćelija, prehrambenih proizvoda, sirovina i proizvoda životinjskog porijekla, veterinarskih lijekova i medicinskih sredstava koji se upotrebljavaju u veterinarstvu, dijagnostičkih sredstava, hrane za životinje, nusproizvoda i njihovih proizvoda, namijenjena uvozu ili provozu u ili kroz Bosnu i Hercegovinu;
- b) **"rješenje"** je dokument kojim se utvrđuje nepostojanje veterinarsko-zdravstvenih smetnji za uvoz i provoz u ili kroz Bosnu i Hercegovinu pošiljki koje moraju ispunjavati uslove propisane Rješenjem, kao i dokument kojim se odobrava upis objekta u Registar;
- c) **"subjekt u poslovanju sa pošiljkama"** (u daljnjem tekstu: Subjekt) je svako pravno ili fizičko lice kojem je odobreno od nadležnog organa da posluje sa pošiljkama navedenim pod tačkom a) ovog člana;
- d) **"registar Ureda za veterinarstvo Bosne i Hercegovine"** (u daljnjem tekstu: Registar), je lista odobrenih objekata iz kojih je dozvoljen uvoz, a koji se vodi na način opisan u Prilogu V. ovog Pravilnika;
- e) **"uvoz"** je svako unošenje pošiljki preko odobrenih graničnih veterinarskih prijelaza Bosne i Hercegovine, isključujući pošiljke u provozu;
- f) **"privremeni uvoz"** je svako privremeno unošenje pošiljki na područje Bosne i Hercegovine, koje nakon isteka Rješenjem određenog perioda moraju biti vraćene u zemlju izvoznicu.
- g) **"provoz"** je svako prevoženje pošiljki iz jedne države preko odobrenih graničnih veterinarskih prijelaza Bosne i Hercegovine u drugu državu;
- h) **"uvoznik"** označava stranku odnosno fizičko ili pravno lice koje podnosi zahtjev za upis objekta u Registar Ureda, te podnosi zahtjev za redovan ili privremeni uvoz ili provoz pošiljki u ili kroz Bosnu i Hercegovinu i odgovoran je za pošiljku u prekograničnom prometu i nakon njene kontrole od strane graničnog veterinarskog inspektora;
- i) **"nadležni veterinarski inspektor"** je veterinarski inspektor zadužen za određeno administrativno područje;
- j) **"garancija"** je službeni dokument izdat od strane nadležnog organa zemlje izvoznice kojim se garantira da je objekt uredno registriran i odobren za izvoz, te da ispunjava propisane veterinarsko-zdravstvene uslove u skladu s važećim propisima zemlje izvoznice.

Član 3.

(Uvoz i provoz pošiljki)

- (1) Uvoz pošiljki u Bosnu i Hercegovinu dozvoljen je:
 - a) pošiljkama za koje uvoznik posjeduje Rješenje izdato od strane Ureda za veterinarstvo Bosne i Hercegovine (u daljnjem tekstu: Ured) u skladu s ovim Pravilnikom;
 - b) pošiljkama navedenim u Prilogu II. ovog Pravilnika, ukoliko potiču iz objekata koji su upisani u Registar u skladu s članom 13. ovog Pravilnika i koje prilikom uvoza prati veterinarsko-zdravstveni certifikat.
- (2) Provoz pošiljki kroz Bosnu i Hercegovinu dozvoljen je:
 - a) pošiljkama živih životinja za koje uvoznik posjeduje Rješenje izdato od strane Ureda u skladu s ovim Pravilnikom;

"Službeni glasnik BiH", broj:57/12

- b) pošiljkama prehrambenih proizvoda, sirovina i proizvoda životinjskog porijekla, veterinarskih lijekova i medicinskih sredstava koji se upotrebljavaju u veterinarstvu, dijagnostičkih sredstava, hrane za životinje, nusproizvoda i njihovih proizvoda.

Član 4.

(Zabrana uvoza i provoza pošiljki)

- (1) Uvoz pošiljki u Bosnu i Hercegovinu nije dozvoljen:
 - a) pošiljkama, osim onih navedenih u Prilogu II. ovog Pravilnika, za koje uvoznik ne posjeduje Rješenje izdato od strane Ureda;
 - b) pošiljkama navedenim u Prilogu II. ovog Pravilnika koje potiču iz objekata koji nisu upisani u Registar u skladu s članom 13. ovog Pravilnika;
 - c) pošiljkama čiji je uvoz zabranjen posebnim propisom.
- (2) Provoz pošiljki kroz Bosnu i Hercegovinu nije dozvoljen:
 - a) pošiljkama živih životinja za koje uvoznik ne posjeduje Rješenje izdato od strane Ureda;
 - b) pošiljkama čiji je provoz zabranjen posebnim propisom.

Član 5.

(Određivanje uslova za uvoz i provoz pošiljki)

- (1) Ured je dužan pri određivanju uslova za uvoz i provoz pošiljki voditi se standardima Evropske unije (EU), te u posebnim slučajevima odredbama potpisanih sporazuma o veterinarskoj saradnji i preporukama Svjetske organizacije za zdravlje životinja (OIE-a), te najnovijim naučnim saznanjima i drugim kriterijima koji doprinose zaštiti zdravlja ljudi i životinja.
- (2) Rješenjem Ured određuje veterinarsko-zdravstvene uslove uvoza ili provoza za pošiljke koje podliježu izdavanju Rješenja.
- (3) Za pošiljke iz Priloga II. ovog Pravilnika koje ne podliježu izdavanju Rješenja, Ured određuje veterinarsko-zdravstvene uslove uvoza ili provoza u skladu sa stavom (1) ovog člana.

Član 6.

(Zahtjev za izdavanje rješenja)

- (1) Zahtjev za izdavanje Rješenja u ovisnosti od vrste pošiljke se podnosi Uredu na jednom od obrazaca propisanih u Prilogu I. ovog Pravilnika.
- (2) Zahtjev se podnosi s čitko upisanim podacima i potpisom uvoznika, a za pravna lica ovjeren pečatom i potpisan od strane odgovornog lica.

Član 7.

(Dokumentacija potrebna za izdavanje rješenja za uvoz)

- (1) Uz zahtjev za izdavanje rješenja za uvoz iz Priloga I. ovog Pravilnika, u ovisnosti od vrste pošiljke prilaže se sljedeća dokumentacija:
 - a) ovjerena kopija sudskog rješenja o obavljanju djelatnosti za pravna lica za sve vrste pošiljki, kada se prvi put podnosi zahtjev;
 - b) kopija rješenja o ispunjenosti veterinarsko -zdravstvenih uslova za rad objekta u koji se uvozi pošiljka, u slučaju da objekat podliježe registraciji, kada se prvi put podnosi zahtjev;
 - c) uvoznik je dužan dostaviti Uredu, ovisno od vrste pošiljke, jedan ili više dolje navedenih dokumenata:
 - 1) pozitivno mišljenje nadležnog veterinarskog inspektora o ispunjavanju uslova propisanih Odlukom o uslovima i trajanju karantina za uvezene životinje ("Službeni glasnik BiH", broj 54/04), sa tačno navedenom adresom karantina i jediničnim kapacitetom za pojedinu vrstu životinja, osim životinja za klanje;
 - 2) pozitivno mišljenje nadležne selekcijske službe o porijeklu, proizvodnoj i priplodnoj vrijednosti u slučaju uvoza pošiljki živih životinja namijenjenih rasplodu;
 - 3) pozivnicu ili prijavni list za učešće žive životinje na sajmu, izložbi, trci i drugim dozvoljenim manifestacijama i identifikacijski dokument koji će pratiti životinje tokom privremenog uvoza;
 - 4) u slučaju privremenog uvoza radi ispaše u Bosnu i Hercegovinu dokaz da je nadležni veterinarski inspektor koji je nadležan za odgovarajuće epizootiološko područje obaviješten o privremenom uvozu na ispašu;
 - 5) specifikaciju robe koja se namjerava uvesti, kako je navedeno u tabeli iz Priloga IV. ovog Pravilnika u slučaju uvoza veterinarskih lijekova, medicinskih i dijagnostičkih sredstava koji podliježu izdavanju rješenja;
 - 6) pozitivno mišljenje nadležne selekcijske službe o kvalitetu sjemena koje se namjerava uvoziti za vještačko osjemenjivanje;

"Službeni glasnik BiH", broj:57/12

- 7) mišljenje ili izvozno odobrenje za izvoz ugroženih divljih vrsta životinja od strane nadležnog organa države izvoznice u skladu s Odlukom o ratifikaciji konvencije o međunarodnoj trgovini ugroženim vrstama divljih životinja i biljaka - CITES ("Službeni glasnik BiH", broj 11/08);
 - 8) mišljenje ili uvezno odobrenje za uvoz ugroženih divljih vrsta životinja od strane nadležnog organa Bosne i Hercegovine u skladu s Odlukom o ratifikaciji konvencije o međunarodnoj trgovini ugroženim vrstama divljih životinja i biljaka - CITES.
- d) zajednički veterinarski ulazni dokument (ZVUD) ili zapisnik/zapisnici o izvršenom veterinarsko-zdravstvenom pregledu na granici za sve vrste pošiljki, po realizaciji prethodnog Rješenja;
 - e) veterinarsko-zdravstveni certifikat zemlje izvoznice za žive životinje, po realizaciji prethodnog Rješenja;
 - f) zapisnik/zapisnici o izvršenom veterinarsko-zdravstvenom pregledu pri istovaru uvezenih pošiljki izdat od strane nadležnog veterinarskog inspektora po realizaciji prethodnog Rješenja;
 - g) rješenje o otvaranju karantina za pošiljke koje podliježu karantinu, izdat od strane nadležnog veterinarskog inspektora po realizaciji prethodnog Rješenja;
 - h) zapisnik/zapisnici o izvršenom uzorkovanju uvezene pošiljke od strane nadležnog veterinarskog inspektora, po realizaciji prethodnog Rješenja;
 - i) rješenje o zatvaranju karantina pošiljki po prethodnom Rješenju o otvaranju karantina, izdato od strane nadležnog veterinarskog inspektora, po realizaciji prethodnog Rješenja;
 - j) rezultat/rezultate analize ovlaštene veterinarske laboratorije o analitičkim i dijagnostičkim ispitivanjima uvezenih pošiljki po realizaciji prethodnog Rješenja;
 - k) zajednički veterinarski izlazni dokument (ZVUD) ili zapisnik/zapisnici o izvršenom veterinarsko-zdravstvenom pregledu na granici za privremeno uvezene životinje po realizaciji prethodnog Rješenja;
 - l) dokaz o uplati naknade za obradu zahtjeva, za sve vrste pošiljki;
 - m) administrativna taksa u iznosu od 15 KM, za sve vrste pošiljki;
- (2) U slučajevima kada uvoznik nije vlasnik već iznajmljuje odnosno uzima u zakup klaonice, skladišta i druge objekte, obavezno mora priložiti i ovjeren ugovor o zakupu objekta.

Član 8.

(Dokumentacija potrebna za izdavanje Rješenja za provoz)

- (1) Uz zahtjev za izdavanje Rješenja za provoz iz Priloga I. ovog Pravilnika, za žive životinje se prilaže dokaz da će susjedna država u ili kroz koju se namjerava uvoziti ili provoziti predmetna pošiljka dozvoliti njen uvoz ili provoz na ili kroz svoje područje.
- (2) Dokaz iz stava (1) ovog člana je zvanični dokument izdat od strane nadležnog organa države uvoznice ili provoznice.

Član 9.

(Izdavanje Rješenja)

- (1) Rješenje izdaje Ured na osnovu podnesenog pisanog zahtjeva uvoznika.
- (2) Rješenje se izdaje za sve pošiljke osim pošiljki navedenih u Prilogu II. ovog Pravilnika.
- (3) Rješenje za upis objekta u Registar izdaje Ured na osnovu podnesenog pisanog zahtjeva uvoznika.

Član 10.

(Pošiljke za koje nije potrebno Rješenje)

- (1) Rješenje nije potrebno za uvoz i provoz pošiljki koje su navedene u Prilogu II. ovog Pravilnika.
- (2) Pošiljke navedene u stavu (1) ovog člana prilikom uvoza i provoza mora pratiti veterinarsko-zdravstveni certifikat na kojem su navedeni uslovi koje propisuje Ured u skladu s članom 5. ovog Pravilnika.
- (3) Veterinarsko-zdravstveni certifikat koji prati pošiljke iz stava (1) ovog člana mora biti u skladu s Odlukom o veterinarskoj svjedodžbi o zdravstvenom stanju životinja i pošiljaka životinjskog porijekla u unutrašnjem i međunarodnom prometu ("Službeni glasnik BiH", br. 33/03, 14/04 i 35/05).

Član 11.

(Privremeni uvoz)

- (1) Privremeno uvezena pošiljka može boraviti na području Bosne i Hercegovine najduže 90 dana.
- (2) O dužem trajanju privremenog uvoza iz stava (1) ovog člana odlučuje Ured na osnovu pisanog zahtjeva stranke.
- (3) Sve žive životinje za koje je izdato Rješenje o privremenom uvozu, moraju nakon isteka Rješenjem određenog perioda biti vraćene u zemlju izvoznicu.
- (4) U slučaju da se ukaže potreba, za trajnim uvozom privremeno uvezenih životinja, uvoznik je dužan obratiti se Uredu sa potpunim zahtjevom iz Priloga I. ovog Pravilnika, da se odobri trajni uvoz privremeno uvezenih životinja.

"Službeni glasnik BiH", broj:57/12

- (5) Uz zahtjev uvoznik je dužan dostaviti i dokaz o uplati naknade za obradu zahtjeva.
- (6) Ured je dužan na osnovu zahtjeva iz stava (4) ovog člana izdati Rješenje.

Član 12.

(Izbor zemlje porijekla, zemlje izvoznice i graničnog
veterinarskog prijelaza)

U zahtjevu uvoznik može navesti:

- a) samo jednu zemlju porijekla pošiljke osim:
 - 1) u slučaju kada se radi o ribama i ribljim proizvodima koji su uhvaćeni na ribarskim brodovima ili brodovima fabrikama koji plove u različitim teritorijalnim vodama, pod različitim zastavama, a vlasništvo su jedne kompanije. U tom slučaju kao, države porijekla, mogu se navesti zemlje u kojima je riba uhvaćena odnosno zemlje pod čijim zastavama brodovi plove;
 - 2) u slučaju uvoza veterinarskih lijekova, medicinskih i dijagnostičkih sredstva koja podliježu izdavanju rješenja može se navesti više država porijekla;
- b) samo jednu zemlju izvoznicu;
- c) odobrene granične veterinarske prijelaze.

Član 13.

(Upis objekta u Registar)

- (1) Objekat može biti upisan u Registar ukoliko ispunjava jedan od uslova:
 - a) da je registriran ili odobren za trgovinu unutar Evropske unije ili za uvoz u Evropskoj uniji i kao takav se nalazi na jednoj od lista odobrenih objekata Evropske unije;
 - b) da je dostavljena garanciju za objekt od strane nadležnog organa države izvoznice s kojom Bosna i Hercegovina ima potpisan sporazum o veterinarskoj saradnji;
 - c) da je pregledan od strane komisije Ureda, koja je nakon pregleda objekta ustanovila da su propisi, standardi, proizvodnja i kontrola koju obavlja država izvoznica najmanje jednaki propisima u Bosni i Hercegovini i da je predviđena najmanje jednaka zaštita potrošača.
- (2) Jednom upisan objekt u Registar ne mora se ponovo upisivati od strane drugog uvoznika koji želi uvoziti iz istog.
- (3) Registri iz Priloga V. ovog Pravilnika se redovno ažuriraju i objavljuju na web stranici Ureda.

Član 14.

(Dokumentacija potrebna za upis objekta u Registar)

- (1) Uz zahtjev za upis objekta u Registar iz Priloga I. ovog Pravilnika prilaže se sljedeća dokumentacija:
 - a) ovjerena kopija sudskog Rješenja o obavljanju djelatnosti za pravna lica za sve vrste pošiljki, kada se prvi put podnosi zahtjev;
 - b) kopija Rješenja o ispunjenosti veterinarsko -zdravstvenih uslova za rad objekta u koji se uvozi pošiljka, u slučaju da subjekt podliježe registraciji, kada se prvi put podnosi zahtjev;
 - c) ovisno od zemlje porijekla i djelatnosti objekta, jedan ili više dolje navedenih dokumenata:
 - 1) kopija Rješenja o registraciji ili odobrenju objekta koji se upisuje u Registar, izdat od nadležnog organa države u kojoj se objekt nalazi, za objekte koji posluju sa hranom koja u sebi sadrži mali postotak životinjske komponente (konditorski objekti, objekti za proizvodnju supa, tjestenina itd.)
 - 2) kopija Rješenja o registraciji ili odobrenju objekta koji se upisuje u Registar, izdat od nadležnog organa države sa kojom Bosna i Hercegovina ima potpisan sporazum o veterinarskoj saradnji kao i garanciju za objekat od strane nadležnog organa države izvoznice.
 - 3) dokument kojim se dokazuje da je objekat registrovan ili odobren od strane Evropske unije da se može baviti trgovinom unutar Evropske unije i da se nalazi na jednoj od lista odobrenih objekata Evropske unije.
 - d) dokaz o uplati administrativne takse u iznosu od 5 KM za upis objekta u Registar;
- (2) Svi dokumenti koji se prilažu uz zahtjev za upis objekta, a koji su napisani na stranim jezicima, moraju imati ovjeren prevod od sudskog tumača na jednom od jezika koji su u službenoj upotrebi u Bosni i Hercegovini.

Član 15.

(Brisanje objekta iz Registra)

- (1) Objekt se briše iz Registra ukoliko ne ispunjava propisane uslove iz člana 13. stava (1) ovog Pravilnika i člana 26. Zakona o veterinarstvu u Bosni i Hercegovini ("Službeni glasnik BiH", broj 34/02);
- (2) Rješenje o brisanju objekta iz Registra se dostavlja subjektu koji je podnio zahtjev za upis objekta u Registar.

"Službeni glasnik BiH", broj:57/12

- (3) Lista objekata koji su izbrisani iz Registra će se redovno objavljivati na web stranici Ureda.

Član 16.

(Registar dobavljača)

- (1) Za upis dobavljača u Registar potrebno je Uredu dostaviti popunjen pisani zahtjev iz Priloga I. ovog Pravilnika.
- (2) Registar dobavljača se redovno ažurira i objavljuje na web stranici Ureda.

Član 17.

(Odobreni granični veterinarski prijelazi)

- (1) Granični veterinarski prijelazi preko kojih se može obavljati uvoz ili provoz pošiljki navedeni su u Prilogu III. ovog Pravilnika.
- (2) U izuzetnim slučajevima pored odobrenih graničnih veterinarskih prijelaza navedenih u Prilogu III. ovog Pravilnika mogu se odrediti i privremeni granični veterinarski prijelazi preko kojih se može obavljati uvoz i izvoz pošiljki.
- (3) Privremeni granični veterinarski prijelazi određuju se u skladu s dogovorom ili sporazumom sa susjednom državom.
- (4) Odluku o određivanju privremenih graničnih veterinarskih prijelaza donosi direktor Ureda za svaki prijelaz pojedinačno.

Član 18.

(Naknade za obradu zahtjeva)

- (1) Visina naknade za obradu zahtjeva koja se uplaćuje za izdavanje Rješenja za uvoz i provoz iznosi 350 KM.
- (2) Visina naknade za obradu zahtjeva koja se uplaćuje za izdavanje Rješenja za privremeni uvoz iznosi 50 KM.
- (3) Naknade iz st. (1) i (2) ovog člana su prihod Budžeta institucija Bosne i Hercegovine i međunarodnih obaveza Bosne i Hercegovine.

Član 19.

(Rok važenja Rješenja)

- (1) Rješenje za uvoz pošiljki prestaje važiti:
 - a) u roku od 120 dana od dana donošenja rješenja;
 - b) ukoliko se prije isteka roka rješenja iz tačke a) ovog stava uveze količina pošiljke dozvoljena Rješenjem.
- (2) Rješenje za privremeni uvoz pošiljki važi 90 dana od dana njegovog donošenja, osim ako Rješenjem nije drugačije propisano.

Član 20.

(Rok izdavanja rješenja)

Ured je dužan uvozniku izdati odgovarajuće Rješenje u roku od 30 dana od dana prijema pisanog zahtjeva.

Član 21.

(Prilozi Pravilnika)

- (1) Prilozi od I. do V. sastavni su dio ovog Pravilnika.
- (2) Izmjene i dopune Priloga ovog Pravilnika donosi direktor Ureda, u skladu s izmjenama i dopunama važećih propisa, koji se odnose na ovu oblast.

Član 22.

(Prestanak važenja)

Stupanjem na snagu ovog Pravilnika prestaje važiti Pravilnik o uslovima uvoza i provoza živih životinja, proizvoda životinjskog porijekla, veterinarskih lijekova, stočne hrane i otpadaka životinjskog porijekla u Bosnu i Hercegovinu ("Službeni glasnik BiH", br. 52/09, 38/10 i 65/10).

Član 23.

(Stupanje na snagu)

Ovaj Pravilnik stupa na snagu osmog dana od dana objavljivanja u "Službenom glasniku BiH".